

安東權氏野翁公派譜序

海東之族莫鉅於我族海東之譜莫先於我譜而自太師公受姓以後歷年已千餘傳世至四十柯葉之布濩遠邇者不知幾萬億人道學文章珪組冠冕卓節名行磊落相望其或隱而不顯散處鄉曲莫不以孝友善信不失其業儒傳世之謨蓋始祖大仁厚德之遺澤觀於此益可徵矣我譜始於成化丙申至高宗丁未凡七成而丁未統輯之譜廣張規模大費工力至四十九卷之多通一國之諸宗猶有闕漏嗣後五十年之間代愈遠而支愈繁欲圖成一牒則篇帙之浩穰將倍蓰於前遍蒐而完竣之事誠難矣所以京鄉各派間多有派譜之作而徃在癸酉我僕射公一派亦重修派譜然恨未得盡錄而均布矣顧今世紀漸降時潮一變重本悖族之風日異一日及今而修譜以示來後視昔尤切昨秋咸浦齋餼席族從麟變奎東諸宗老相與言之曰居今而無望乎大同合譜似勢不獲已縱曰派譜代稍遠而支稍衆則亦有未易亟圖者就事簡而期

功速惟吾一門修野翁祖以下派譜不猶愈於待其合而緩其成乎咸曰唯唯於是排定任員取印所之近而設譜所於道溪書院不幾月而功告訖任司諸員之勤敏於事亦多矣譜凡五冊視諸全宗則殆百十之一今日之不與吾譜者有若疎且遠焉然一人之身而分爲幾萬億人則幾萬億人便是一人之身爲吾始祖之裔者有疎遠視此譜則是豈今日修譜之本意也哉尊祖而敬宗重彝倫而務敦睦自近及遠有補於風化者是所望於無窮也余不以不文辭弁卷之責謹書之如右僭妄是懼

歲丁酉小春節 太師后三十三世孫泰斗謹叙

成化譜序

權本新羅宗姓金氏也羅季有金公幸者守古昌郡時甄萱入新羅弑王辱妣高麗太祖赴救與萱相持幸謀於衆曰萱義不共戴天盍歸王公以雪痛憤遂迎降麗祖曰幸能炳幾達權乃賜姓權授太師以郡爲食邑陞爲安東府幸生仁幸官至郎中仁幸生册册自求爲本邑吏權氏自册爲吏以還中微不振者七世至守平復興子孫趾美逮文正始大顯隆守洪之後文坦亦復貴顯權氏遂分爲二大族今衣冠簪履布列朝著餘數千指皆二族支派也居正外祖陽村權文忠公近亦文正曾孫舅氏權文景公隄始修家譜小牒子吉昌權翼平公學承先志廣採博訪大加增潤亦未就緒居正與尙州判官朴元昌大丘府使崔灝元又加搜問補其闕遺證其訛僞釐爲圖譜二卷其爲譜詳於文正文坦以下而略其上者錄其所可知而缺其所不可知將以傳信將來耳譜旣成倩慶尙監司尹公壕刊于安東府予惟古者有宗法序昭穆別支庶子孫雖百

世可考自宗法廢而譜牒興凡爲譜必推本其所自出而詳錄其所由分明支派別親疎猶足以篤恩誼而正倫理者矣隋唐而上置圖譜局有郎吏以掌撰述婚姻選舉皆闕譜牒今中朝上自公卿大夫下至孤門單族亦莫不有譜上自唐虞三代始封之祖而祖之雖高辛神農顓頊之遠皆一一接續而序次其譜系豈不以圖牒相傳得有所考歟吾東方自古無宗法又無譜牒雖巨家大族絕無家乘繼傳數世有不記高曾祖考名號者子孫寢以乖隔或不識總功之親視同路人何待服盡親盡而疎且遠哉如是而欲興孝弟成禮讓豈不難乎此吾文景翼平所以惓惓於著譜而居正之勉卒其志者也權氏自太師始封今六百年子孫蕃衍詩禮之澤悠久未艾蓋根深者末茂源遠者流長理之必然也嗚呼自古名宗華胄不爲不多當其珪組蟬聯門地煥赫孰非可慕而可尊者乎曾未數傳傾覆勦絕何哉由其先世封植未固而子孫遽以驕奢失之也權氏世以清白傳家忠孝爲心爲子孫者可不念祖宗積之之勤而思所

以繼之之道乎記曰人道親親也親親故尊祖尊祖故敬宗敬宗故取族若能始於親親推及九族則所以厚本敦末者豈有窮哉詩曰無念爾祖聿修厥德吾更爲權氏子孫勛之成化紀元之十二年蒼龍丙申正月日純誠明亮佐理功臣崇政大夫行議政府左參贊兼藝文館大提學知成均館事同知 經筵事達城君徐居正剛中叙

自高麗太祖至于我

朝權幸子孫蕃衍其爲顯達者難以枚舉其未顯者不知有幾今達城徐相居正以權文忠公外孫因文景權相躋冀平權相學兩公所撰族譜更加彙括編爲三帙使權氏宗支會于一譜雖微者昭然可稽倩于慶尙監司尹相壕刊行尹相幸之裔二相適外玄孫也亦樂爲之從使刊于安東府命鎮監督不日功訖徐相尊祖敬宗之意益以著矣歲成化十二年丙申三月日中訓大夫行安東大都護府教授崔鎮謹跋

乙巳譜序

紀往在萬曆戊子間承家命修世譜顧以孤陋寡聞未敢下手於全譜只自九代祖禮儀判書鞠之後不分內外支派撰成一卷其卷帙極大先人愛其譜常坐臥不離於側不肖子不能保失於天將楊麻大軍南下之日罪不自容深念更謀收錄以慰先志時丁孔棘未暇措意於其間會都元帥權公慄以高牙大纛來祭于始祖之墓合境內宗人設會于墓下坐上宗老合辭告于元帥曰吾權氏舊譜板本在本府而已失於倭賊平日印藏而能保於亂離者亦十無一二焉權氏之不倖孰有大於此哉又起而告曰在京宗族中必有能修之人願令公極力囑成何如元帥曰入京當不忘僉教但恐能手未易得也今日之會無慮百餘人此中豈無人可托者乎宗老對曰權某可矣元帥喜而進之執蓋相酌曰前日之錄雖失於兵火尊先君之所勤念者不可孤負須勉力再修以慰先靈副門望紀辭不獲命厥後都事權公縉給紙筆之資乃與宗叔叅奉

權行可氏及太師廟有司權重常協心同力貿楮造紙成正本若干卷然後方
擬修正全譜乃定有司通文於四境使之勿論同異姓限月日收錄或詳或略
所錄不一乃更通問而得其實自此紀專心竭力於八年之間參以已見質諸
他人又取吾東方諸家譜牒亦盡搜考而錄成草本常置案上細繹琢磨在左
見似無可疑然後遂親手正書凡十六帙矣蓋今吾之譜非但譜權氏詳外派
者依舊譜也盡其所知而畧其所未知者勢也吁譜牒明則親親之道立親親
之道立則風俗正風俗正則治教成譜苟不明則人之道滅而不近於禽獸者
幾希然則譜之闕於風化者大矣紀本昧學無有所得追感先人勤懇之意又
重元帥諸公之勸茲敢輯錄以冀明眼之補闕正訛云萬曆乙巳月日二十三
代孫參奉紀謹識

甲午譜跋

昔陳后山有言曰自吾之親而至于忘之者遠也遠故譜之所由作也古人之

所以重宗尊祖者夫豈偶然哉惟我永嘉之權鼻於太師而自麗祖錫姓之後
子孫繁昌上下五百年間世襲冠冕至於一家九封君門戶之大於斯爲盛矣
入我朝名公鉅卿代不乏人或以勳庸記諸彝鼎或以文章鳴於國家赫赫
在人耳目豈非先祖之遺澤悠久而不斬者哉太師公祠宇在永嘉府內後嗣
子孫世守其祠至今罔缺思欲一者瞻拜以展追遠之誠者此人情之所必至
而繫官于朝願莫之遂上年冬適承乏出按嶺南趨造墓所省掃封塋捐俸鳩
材建置齋舍以爲永世崇奉之地退與同宗若而人謀曰古者族有譜家有牒
而獨於吾宗尙今闕焉雖有大譜草本而不能入梓於心每有所歎然茲者善
山伯勛星州牧詣俱以仍雲出宰道內與之同事參互考證是亦天與之便也
皆曰諾於是擇於同宗中別定修正有司裒集諸家所藏譜草兼撫衆說證定
訛謬補其闕遺遂成安東權氏族譜一部宗派之別疎遠之屬靡不詳悉開卷
瞭然其於報本敦叙之義庶乎無憾矣至於子姓外裔如欲遍記則訛舛相承

記不能詳簡牘太煩觀者病焉故今姑略之以俟後之君子繼是而張大者也
嘗聞程子之說曰收宗族厚風俗使人不忘本須是明譜系凡我同宗之人益
勉孝悌之心毋墜祖先之業使敦睦之義世守而勿失則斯譜之作其亦有補
於風化之萬一云爾歲甲午夏後孫慶尙道觀察使兼巡察使堦謹跋

辛巳譜序

世之百族皆有譜然譜有四難祖世遠而枝派繁則難詳一難也一士之耳目
不能周乎遠近若無敏達之士悼比事者不能助發聰明旁搜而博證此二難
也孽孫無近嫡或蒙殘系之正派而亂其嫡閑民規避役或窺功臣之絕緒而
冒爲後不窮根不能明不明見不能正此三難也假今之擣掇所遺序列悉應
實或無能承其後者明而俄且迷正而俄且紊此四難也夫單門族類寡則易
譜也間亦難於覈領而或不克若其當况譜名宗大族而歷道所難若云四者
特其大略耳纖微之間有不可勝理者可遍而目言之哉我權氏積德累善之

世也自太師受姓以來幾千年子孫代益盛上而公卿大夫賢英才學之士文武有勳力之臣接聲烈於朝下而布衣諸生庶人吏胥賤隸盈於國中本一根而條循而葉計之則可千萬數欲總同貴賤而譜次之則雖察士不能若所出微源系無所考而不可得以譜者不論即夫洪枝巨派世之所訟見而慕望者及所自而嬗傳至夫見在人也明有符頰可著者而序錄之差若不難而猶患夫包羅或不能悉又患夫莫與爲因資又患夫託邪隧堞之者又多他妄繆相紛者故吾宗之譜視諸氏尤難我祖初文景公隄始爲家譜不及統輯一宗府院君掌嗣爲之亦不卒徐相國居正文景之甥也與判官朴元昌府使崔灝元踵成圖譜二卷梓行之議者猶恨其闕漏多板刻遇難散失不復傳後百數十年參奉紀與叅奉行可及太師廟有司重常因舊譜增修旣屬草而時無能力爲此者不時授梓卒伏不發後五十年參判堦觀察嶺南選於宗而王修宗譜通收諸家譜草省外裔定著宗姓爲譜一卷刻之安東府而記載略證校疎所

爲聽察而是正之者不能不令覽者生之言後幾五十年縣監秦時氏慨吾盛宗無全譜與府中宗人通共嶺中諸宗世系釐爲七卷蓋作始也已聞正郎胄氏旣修文忠公子孫錄因欲總修宗譜乃將七卷譜遣詣家願合成譜後有年順興宗人胤錫閱譜久不就私備梓累百板走告胄氏胄氏謝病不取所爲譜并所集右尹認持平恒參判珪所修世譜歸之于秦時氏於是諸家譜畢集與幼學壇燈萬里斗韓處經郡守聖規縣監斗寅等專志力領理諸譜及所記聞於四方者參互考對刻僞存真要使統緒明而曲故不得容外派曾孫而止作原譜十一卷別譜二卷凡十三卷雖不可曰太山之草可盡數上路之塵可盡滌合群賢之明智而蘇尋酒濯審而勤也設有遺莖餘埃當亦少矣夫譜非私所譜者一姓也爲世教也禮言尊祖敬宗收族之道已備此道也上能之則大本立於上下能之則人道竭於下以至百志成禮俗刑此上下交相冀者也是以后王聽治必先治親治親始於譜牒故昔唐太宗詔著天下世族志我

世宗命撰東國姓氏錄領天下國家而欲善治者要賴此耳然士之志於譜學者寡間亦有之而或不能竟其意或不寡於來情非直爲之難蓋亦不值夫能於此而執終始者也乃今吾宗譜屢有得失而始茲完定差須泰時氏耳既敬賀譜成已又以禮所謂者深有望於我諸宗若今徃施續願貽夫後之宗儁刊役則埒有中主而工費用則前後觀察使前後府伯多所助籍訖刻云崇禎丙子後六十六年辛巳夏四月日資憲大夫行龍驤副護軍權愈謹序

權太師內外子孫之蕃衍其麗不億實吾東方之盛族也余於庚辰五月知安東府到官所翌日祇謁子太師廟凡爲地主者疇不仰止太師而余又

忝居外裔之末崇奉之道安敢怠闕禮訖坐崇報堂敬檢太師遺蹟有若潭氏

萬知氏斗韓氏三人揖余而言曰權氏譜牒刊行於世者非一本而記載或疎年代浸久前縣監泰時甫裒集定著先成七卷與洛中宗人私記之譜合爲十三卷分授同宗諸君子精加校讐仍付剞劂氏數月而工斷手使遐

苗咸知得姓之所自來派流之所由分其用意完譜可謂勤且摯矣太學士
愈公序語甚詳更不容贅他以余適守是府預聞是役諸君子必使余跋其
後辭不得略叙始末如是云爾辛巳日南至通政大夫行府使朴紳謹跋

甲寅譜跋

我權得姓以後柯葉分布殆滿一國爲東方蟬聯大族而所謂譜古則無之
國初以下二百年間只有四佳成化譜上下卷刊行其後龍巒公乙巳譜十
六卷草定而未刊甲午譜雖刊而單卷草草所放失甚多其餘若公山譜盤
松譜鑄洞譜又皆私藏草本而已全譜修刊之不易有如此者廼於

肅廟丙子領中諸宗老懼其散落而無統緒悉取古今諸家本加彙括焉合成
一本摠十三卷越六年辛巳始入梓于本府吾家譜乃得完且成而印布未
廣旋值辛丑大火板皆爲燼噫乎何其不倖也甲辰秋宗人等慨然發議重
刊前寢郎厚氏聞而樂成之遂發告中外更聚各派譜單參考草本辨別疑

亂出草稿十二帙已酉夏委送于本所就加讐校凡三易稿定爲原譜十四卷別譜三卷顧其編帙浩穰工費許多故嶺之諸宗爲收合錢財又得湖嶺伯所助百餘金合而子母之穫其窳六年而後始役首尾五朔乃克斷手其艱甚矣茲故略記其前後繼述之勤以備門中掌故且以示譜事之難如是云甲寅六月日二十六代孫德秀謹跋

甲寅譜序

系譜之傳厥惟難矣自曾子固之淹博已不能無失而有氏族之辨而况偏方諛陋之見哉惟我安東之權白太師公以下碩輔名卿世奕代振如漢之金張晉之王謝不待徵之家譜而於金華之記可按而知也然吾家之重氏族舊矣譜牒之修亦屢矣不以赫赫然照人爲自夸而以古人系譜之難爲可戒其旨遠矣雖然舊譜之成今已六十餘年矣裕之孫曾亦多有承冠且抱子者矣而裕之名不得入焉則計我諸宗之散在四方者又凡幾人矣派別甚繁多哀

輯劇龐蹟除非數十人之力數十年之功有未易了當者則吾家之譜其將廢矣余蓋隱之於心而竊憂之歲辛亥春金太師之後在安東者爭太師廟奠獻事妄肆誣詆安東諸宗氏亟來教告余余與露章陳辨遂蒙 上特加昭釋已仍以前所隱憂於心者諭諸宗氏曰失今不爲恐此事便已諸宗氏盍相與勉旃咸曰諾於是廣搜博訪勤鳩嚴董閱四年工告訖凡三十四卷雖其規模例凡遵承乎成法而編帙之大工役之鉅實倍蓰于前乃諸宗氏殫竭心力用能續成使我三數世闕典至是完焉其志誠且勤矣而亦不替吾家重氏族之前矩矣諸宗氏以裕預知茲役合有一言裕辭不獲余惟是譔也詳內而略外重始而謹終於其枝派之蕃衍也有以知積德之深厚於其簪組之輝赫也有以驗流慶之弘長凡我諸宗孫子無徒以是譜之成爲喜各自磨濯淬礪以敦孝悌廣睦嫺母或忝爲 太師公雲仍也則是譜也未必非他日昌大門戶之一權輿也非特重氏族之意而已也

上之十八年甲寅六月二十八代孫前大司諫裕謹識

譜所以普其族序所以叙其事則譜家之有序也尙矣然海東之族莫鉅於我族海東之譜莫古於我譜則今日編述之役厥惟難矣其可曰前人之序已備而不思所以略叙其事乎哉我譜自我先祖止齋文景公諱跽肇修家牒翼平公孳嗣輯之而文景公之甥徐四佳居正踵成圖譜刊而行之世是所謂成化譜也其後龍巒公之乙巳譜東谷公之甲午譜或藁或梓詳略相懸俱未成全譜 明陵辛巳生曾祖縣監山澤齋諱泰時與宗中名選合諸家譜成原別十三卷乃我宗一 部惇史也刊板藏弄 始祖廟傍燬于辛丑之火從祖松坡公可徵若門內長德諸公慨然興咨往復于鑄洞參奉公厚氏合議更修歷十年始成時辛巳後三十年甲寅也當時髻鬣未入錄者到今幾盡凋零存者亦墓木已拱矣今

上辛亥金氏誣書出京鄉諸宗上章陳辨得蒙洗草之 恩命廼於南營水閣

會議修譜事遂定京有司若干人文諭于安東諸宗曰我譜自成化來四成於安東皆刊於安東今茲之事豈非僉宗之責歟於是齊會陵齋排定任員宗老焯明佑氏與生員思儼教官思浩幼學聖鳳主摠裁事而訪亦與焉幼學鼎鉉七紀親生員昌愈宅孚進士馨復等相與左右之壬子春開局于府中收牒編摩繕寫警校而事之大小無不復難于京有司凡易藁者三對同磨勘者七八焉癸丑八月先刻三卷甲寅三月繼刊四卷以下六月工告訖原譜二十九卷別譜五卷合三十四卷前後得錢僅四千緡零都辨諸人勤幹纖悉措處有方費省而見功多者皆其力也噫世代寢遠孫支且繁編刊之難比舊譜殆倍蓰矣任吾輩愆用精力而安知無考覈之疎闕遺之恨也譜旣成宗老明佑氏詔不佞曰弁蹊已藉手於京有司二公然不可無此間文字以記其顛末而吾旣毫及子盍代之况是譜勦與成皆出於子之祖先乎訪辭不獲命乃附卷而歎曰我宗自勝國以來至于今日者組蟬聯爲東方甲族觀於譜牒有道德經術

之儒有文章才諳之人達則銘彝鼎而振聲烈於朝窮則獨善私淑而爲後
學師範暨忠臣孝子卓節懿行聯芳趾美輝映千後豈不盛哉顧今我宗之布
在八路者舉皆其雲仍也今於按是譜也各思所以克肖先休裊躬勉學常若
親承乎詩禮之教誨耳面之提命則一氣所感善端油然而忠孝才德自家達邦
不墜永世之家聲矣然則是譜之修不徒爲序昭穆篤倫彝之資而抑將有補
於國家之風教矣詩曰無念爾祖聿修厥德此四佳公所引於舊序者今且申
舉之以勗我同譜諸君子因著任員名字于編末使後之覽者知京鄉我宗同
心於譜事如此云

上之十八年甲寅秋九月日二十八世孫前兵部曹佐郎訪謹序

壬戌譜序

東方氏族之有譜莫普於我族在受姓以前即始林之裔非文獻可徵自大匡
太師以來歷世三十歷年千餘柯業之布濩一國不可以萬億計維組冠冕之

奕世蟬聯由麗及鮮又不知幾十家名賢鉅公之忠勸著於國德範于世者磊落相望其或隱而不顯散處窮鄉而皆以儒業相傳不失爲孝友順信之家謨其根深末茂源遠流長蓋可徵矣我譜自成化內申至正廟甲寅凡六成而統輯一宗該源委合遠邇通國無二譜焉甲寅之譜因繁衍之餘緒而補闕漏之別系摠之爲三十四卷之多其規模弘遠體例張大前人用心之勤非後輩所可及也厥後六十餘年迄未有踵而成之者間或有合譜之論而累發而累寢歲己未冬族中諸長老會于陵齋合辭言曰事固守常而亦或變例此因革之所以不同甲寅以後分支者益繁繼序者愈遠今欲合諸宗而圖成一牒則篇秩之浩穰將倍蓰於前此京鄉一二鉅派之所以有派譜之作其就簡便傳久遠不猶愈於欲其合而無其期乎於是排定任員嚴蒐勤董自庚申冬而始役越三年壬戌春工告訖凡十四卷惟我鼻祖以後中微不振十世而至尙書左僕射諱守洪始顯實爲我派祖四世徐公成化譜序中與樞密公諱守平

而并稱爲二大族者也僕射公之後雲仍克昌幾遍域中視諸全譜迨十之居
三四而向所謂德學名勳之流芳趾美又非諸家所及挽近以還聲光寢邈而
其尙文雅重彝教之流風餘韻猶有不全泯者則雖爲我宗之一派而實無讓
於世所稱盛門巨族矣嗚呼人情近則親遠則疎愈遠而愈疎則忘忘則爲路
人是譜之獨於吾派親之也夫旣親之矣則尤當管攝人心講信修睦益求其
光前啓後之謨而門戶昌大之機亦將權輿於是矣此同譜諸君子之所當勉
言而今日之不與吾譜者即所謂愈遠愈疎而至於忘者耳以一人之身而分
爲百千萬億旣久且繁各自奠繫斯固勢也勢吾無如之何而其情惡得無楊
然者乎是譜也以僕射爲祖而以僕射以上十世冠之者所以同其源也推是
心也雖百世之遠皆吾始祖之子孫惇宗重本之意又豈可以是譜而限之哉
此吾諸宗之又當重勉者也若其條例與故實一遵乎成法而前譜之序已備
述矣只叙其別立派譜之由書之卷端

上之十三年壬戌仲春日僕射公二十一代孫璉夏謹序

壬戌譜引

自吾始祖太師公一體而分爲百千萬億身至三十有餘世星羅碁布於數千里之外者合而載之一帙中有時披閱奉翫敬愛之心油然而生此古人所以重譜事而邇遠厚薄親疎之一道也今派譜爲門戶分張源流界劃遠者愈遠疎者愈疎無亦有盤於敦宗族厚民俗之法意乎曰唯唯否否吾權氏得姓來麗朝五百年未有譜逮成化間四佳徐公始爲譜二卷其後有龍巒公乙巳譜十六帙而未及梓其後有甲午譜一卷其後又有辛巳譜十三卷其後又有甲寅譜十七卷至

正廟甲寅又重刊三十四卷世代寢降編帙愈多庸時從初譜例專務省約而卷否猶若是夥然苟如他家譜不厭詳細則見行編帙當倍蓰於此矣十餘年前京鄉宗族屢發合譜之議爬定任員通告八方延宕歲月迄無收刷竣事之

期於是焉樞密派副正派佐尹派給事中派各爲派譜今我僕射派之爲派譜亦事勢之所不獲已者也繕成凡十有四篇首尾三載工役告訖數三長老擔
劣其勞豈不難哉遂在甲寅各派之撮印派譜者居多是合譜而派譜也從今
以後會同派譜藏諸 始祖墳庵則是派譜而合譜也爲吾 始祖之裔者或
以異譜而忽忘焉則是豈今日派譜之本意也哉嗚呼帝典之以親九族周官
之孝友睦婣是聖人之躬行先務而教萬民之方亦不外是至以後世觀之鎮
富貴而享涕祿者必多孝友敦睦之家則凡爲人者可以知所以勸耳矣觀吾
譜者慎勿以派譜而少之果能親親而恐或疎自遁而不忘遠引而伸之觸類
而長之堯舜三代之教修齊治平之道將不待他求而得之於此矣壬戌春太
師後三十一代孫人夏謹叙

癸酉譜序

永嘉之權自大匡太師受姓於麗初柯分葉彙布濩一國者其麗不億而上下

千百載忠孝爲傳世之謨文獻爲承家之範達而在朝則名公鉅卿巍勳大業
輝映竹帛窮而在野則文學德望潛光懿澤表率鄉黨雖散處遐陬編在氓戶
者亦不失儒素本色故世之數氏族之鉅者必以權爲甲乙而譜法之行於東
土亦莫或先焉四佳徐公成化譜序至今可讀也自成化丙申至 高宗庚子
譜凡八成派分十五而編帙之少者二三册多者四十餘卷蓋繼序愈繁則編
帙愈鉅編帙愈鉅則記載難詳斯固理勢之所不得免者也於是就簡便圖久
遠各修派譜太師后九世孫諱守洪僕射派初祖也由其分門久而閱世遠故
門戶之蕃昌代德之綿延足以敵人之全族焉遂在壬戌始修派譜十三册就
其中又別其源系爲七派便若泰山之祖于崑崙者分峙爲梁呂諸鎮焉視諸
合譜殆十之二三而刪煩補遺顯略昭微開卷瞭然不覺孝悌之心油然而生
也今又七十年之久則幼未入錄者老死殆盡徃徃有歷世而見漏者若因此
而馴致漫漶則生卒配墓惘然而失之矣矧伊世途滄桑之後後之人雖欲厚

其宗法詳其自出將何從而踵修之乎上年秋自達句宗會發續修之論至是歲夏爬定有司先印上系諸家軍帖將隨粹隨板計以相大猥忝監校之名幹事諸公馳書數百里問序於相大相大仍竊念派譜之勦作也先子素軒公與既齋翁編摩之有序與引顧頤情病洫惟懼不堪豈敢自外於此事役乃復之曰程子不云乎管攝天下人心收宗族厚風俗須是明譜系斯乃先王所以重宗法親九族者也我東自麗以來世之白族莫不有譜合之爲通國之世乘分之爲一家之良史故博雅之君子誦名門右族之系不翅如指掌以之明人倫厚民俗矣降至叔季綱紀紊而風教移詩所謂周室道衰棄其九族者不倖而近之矣其非可哀之甚乎凡我同譜之人勿以派譜而限之親親而邇遠厚本而敦末以及乎嚮時合譜之疎族焉則於興禮樂振教化之道未必無少補云

爾

壬戌後七十二年癸酉梅雨節僕射公二十三世孫相大謹序

墓誌

安東權氏世譜

原系

始祖權幸

諱麗史或作行
本金氏晉羅宗
姓敬順王三年
已廿十月甄萱
圍古昌公與同
郡金公實平張
公貞弼倡義佐
麗祖庚寅正月
破萱于瓶山麗
祖曰金幸能炳
幾達權賜姓權
拜大相尋陞三
韓壁上三重大
匡亞父功臣太
師陞郡為安東
府為食邑遺民

二世

子仁幸

郎李益齋齊
賢云羅人有祖
子孫同名者蓋
時俗然也夫人
陽川許氏父大
匡孔岩村主宣
文此下十餘代
墓所及夫人姓
氏皆失傳○清
道孔岩村北亭
子洞有大塚俗
傳權陵 英祖
丙寅二十八世
孫懶按本道遺
碑尋險未得○
正祖戊申傍居

三世

子册

戶長正朝高麗
成宗二年初置
十二牧鄉吏職
號以堂大等為
戶長以大為副
戶長以郎中為
戶長同正員外
郎為副正公自
求為戶長糾正
風俗仍以世仕

子綸

四世

子均漢

右一品別將

子光漢

戶長○乙已譜
始入錄

子謙漢

戶長同正○乙
已譜始入錄

子應和

五世

子子彭

戶長正朝

子宏玉

戶長

子宏真

戶長

子位融

戶長正朝

子公晃

六世

子先盖

子儒允

子黃軒

子安宏

子珠夫